



Nuusbrief 2 van 2018

Hoërskool P.J. Olivier

Bo-Robinsonstraat

Grahamstad

6140

Tel: 046-6223322

www.hspjolivier.co.za

Belangrike datums:

Skool Heropen 17/7

Quermiddag en -aand 19/7

Gr. 8— 12 Winterbal 27/7

P.J. Tennis Pretdag 31/7

Oudskoliere Reünie 3—5 /8

Langnaweek 9—12/8

Talentaand 16/8

Eerste Netbalspan Toer 18/8

P.J. Gholfdag 24/8

Gr. 7 Toer 7/9

Laerskool Sokkie 13/9

Matriekafskeid 27/9

Skole Sluit 28/9

Ma-en-Dogteree, 12 Mei 2018

Op Saterdag, 12 Mei 2018, het P.J. 'n Ma-en-Dogteree aangebied. Dit was 'n heerlike middag waartydens die mammas stomgeslaan was om te sien hoe ons dogters wat ons gewoonlik in skooluniforms en sportklere sien, skielik in pragtige jong dames ontpop het. Nege van ons dogters het model gespeel en pragtige aanddrag van EllaV ten toon gestel.

Charné van Navara Lapis het 'n praatjie gelewer oor velsorg. Daar was wonderlike pryse vir gelukkige trekkings. Ons wil graag die volgende borge bedank: Salon Gavroche, Van Schaik Boekhandel, Navara Lapis, Pick 'n Pay, Redwood Spur, Café D'Ivine, Carol's Unisex en Mev. Tutton.

Ons wil ook baie dankie sê vir die mammas wat as gasvroue opgetree het. Sonder julle kreatiwiteit sou hierdie middag nie moontlik gewees het nie. Baie dankie aan mev. Roux, mev. Schoonbee, mev. Retief, mev. Myburgh, mev. Janse van Rensburg en mev. Grobbelaar wat die tafels so pragtig versier het en sulke fantastiese gasvroue was.

Ons is ook bederf deur heerlike eetgoed deur Esmé Basola. Ons hoop om hierdie 'n jaarlikse instelling te maak.

C. VAN VUUREN



Uit die hoof se kantoor

Geagte Owers

Winter

**Nou lê die aarde nagtelang en week
in die donker stil genade van die reën,
en skemer huise en takke daeliks bleek
deur die wit mistigheid en suisong heen.
Dis alles ryk en rustig van die swaar
geheime wasdom wat sy paaie vind
deur warm aarde na elke skeut en blaar,
en ver en naby alles duister bind
in vog en vrugbaarheid en groot verlange;
tot ons 'n helder middag skielik sien
die gras blink, en die jong graan teen die hange,
en weet dat alle rus die lewe dien:
hoe kon ek dink dat somer ryker is
as hierdie groei se stil geheimenis?**

Die wintermaande en koue het vinnig op ons toegesak. Winter is 'n mooi tyd van die jaar. Niemand kon dit so mooi verwoord soos N.P. van Wyk Louw in sy gedig "Winter" nie.

In baie opsigte laat die gedig my dink aan 'n kind wat grootword. Die geheime wasdom, vog en vrugbaarheid wat inwerk deur ouerhuis, skool en gemeenskap wat saam hierdie kosbare mensie grootmaak. Skielik, soos in die gedig, is die gras blink, jong graan teen die hange – gereed vir die lewe. Daar is geen groter gawe van genade as ons kinders na hierdie relatiewe rustige tydperk van hulle lewe die wêreld binnestap nie. Dis 'n kosbare tyd – dankie dat u u kind met ons in hierdie groeigeheimenis toevertrou.

Hierdie week is ons verbysterd met die grusame moord op 'n Graad 12 – leerling van

Ntsika, Mbalentle Mabala. 'n Jongmeisie wat deur 'n geliefde koelbloedig vermoor is. Die redes en beskuldigde (s) sal weldra bekend word, maar dit sal nooit weer hierdie meisie van 17 terug bring nie. Sy sal moontlik net nog 'n statistiese syfer word. Die pyn en rou wat hierdie familie en skool hierdie week moet deurmaak sal 'n letsel op almal betrokke los. Dis 'n wekroep ook vir ons – hoe verhoed ons dat ons eie kosbare Mbalentle's veilig is?

Die eerste onaangename waarheid is dat die meeste mense wat geweld pleeg teenoor kinders, iemand is wat hulle ken en vertrou. Dit kan 'n familielid, gesinslid of 'n vriend wees. Dis daarom so belangrik dat ons gereeld sekerraak dat die kontak wat ons kinders met ander het te alle tye aanvaarbaar is. Die tweede is die selfoon wat ons vertrou om soos 'n ouer te kyk na ons kinders. Ons glo valslik dat selfoonkontak gelyk is aan veiligheid. Ons glo dat ons kind sal in 'n noedsituasie ons kan bel as hulle onveilig voel. Hierdie is 'n mite, want dit gaan van die veronderstelling uit dat die aanvaller onbekend is aan selfone. Die derde onaangename waarheid is dat ons nie kennis dra van die vriende wat ons kind het op sosiale media nie. Ons glo dat almal op ons kind se kontaklys skoolgaande is en dat die gesprekke sinvolle kommunikasie is wat nie die perke van aanvaarbare gedrag oorskry nie. Wanneer laas het u deur u kind se selfoonkontaklys geblaai? Weet u met wie u kind gesels op WhatsApp? Waarvan hou u kind of deel u kind op Facebook? Ken u u kind se kontakte op Facebook, Instagram ens. Die vierde onaangename waarheid is die foto's wat u kind van hom of haar neem as 'n selfie en dit pos op sosiale netwerke. Vra self af of 'n onbekende sal kan besef dat dit 'n skoolgaande kind is. Daar is geen verskoning vir enige volwassene om kontak te hê met 'n skoolgaande kind in die geheim nie. Praat asseblief met u kind, waarsku en stel maatreëls in waarmee u tevrede is.

Ons gaan binnekort die fees tegemoed waar daar meer as die normale aanslag op ons kinders sal wees. Moenie toelaat dat u kinders plekke alleen of net saam met maats besoek nie. Maak seker dat u kind by die plek is waar hy of sy gesê het hy of sy sal wees.

Mag die dood van Mbalentle Mabala ons nie verby gaan nie. Sy was jonk en in die kleur van haar lewe soos jong graan blink teen die hange reg vir die somer van haar lewe. Mag ons Hemelse Vader ons beskerm en help om ons kosbaarste veilig te hou.

Die skool se finansies is onder konstante druk en die beheerliggaam onder leiding van mnr. Henning werk aan planne om hierdie druk te verlig. Ons is bevoordeel om die OOV onder leiding van die Schoonbees te hê wat naweke opoffer om fondse in te samel. Dankie aan elke ouer wat kom help – julle is staatmakers! Die Kunstefees is 'n geleentheid wat die skool aangryp om ons inkomste aan te vul. Dankie aan mnre. Wepener en Goba asook mev. Adams en werkers wat in hulle vakansie gaan werk om hierdie inkomste moontlik te kan maak.

Goeie onderrig is gekoppel aan goedgekwalifiseerde onderwysers. Ons by PJ Olivier het 'n baie goeie span opvoeders wat werklik die ekstra myl aflê vir leerlinge. Ek bedank hulle vir die wyse waarop hulle hul dagtaak verrig. Die buitemuurs gaan van krag tot krag en ons deelname en betrokkenheid het verbeter op alle terreine. Dankie aan alle ouers wat hulle kinders gereeld kom ondersteun.

Bale werk word agter die skerms verrig om die skool te bestuur. Hierdie kwartaal was geen uitsondering nie, met netelige kwessies wat moeilik is om op te los. Dankie aan die leierspan wat hulle portefeuilles en meer met bekwaamheid bestuur en die graadhoofde wat werklik moeite doen om leerlinge by te staan. In besonder dankie aan mnr. Cronjé wat my op 'n daagliks basis ondersteun.

Ek hoop u gaan iewers 'n tydjie afknyp om by die Kunstefees uit te kom en dat u die vakansie saam met u gesin sal geniet

Groete

J.C. Retief

**Hoërskool P.J. Olivier
Grahamstad**
*PJ se horisonne begin waar die
van ander eindig.*
AANSOEKE VIR 2019
NOU BESKIKBAAR.
Tel: 046-6223322
admin@hspjolivier.co.za
Respek. Integriteit. Omgee

'n Dringende versoek word aan ouers gerig om asseblief seker te maak dat die skool in besit is van u korrekte selfoonnommers. Dit word benodig vir SMS-boodskappe en noodgevalle.

Van Schaik English Writing Competition—“If I were a book, this is the story I would tell”

Herewith Shirley Retief's essay which won third prize in the national competition.

The boy is standing underneath the robot. He is very small and thin. He's wearing something that can perhaps be qualified as a school uniform. The uniform is a few sizes too small for him. It's also quite dirty. The boy looks a bit pale in the face, as if he had eaten a long time ago.

The boy stood there every day, now. The same clothes, the same thin body and probably, the same story. And always the boy would be waiting. Perhaps for his transport or taxi. Maybe for a family member or a close friend. Maybe he would wait for one of his school friends to meet him there and they would walk together.

But then maybe... Just maybe, he was waiting for someone to see him and to offer to drive him to school. Maybe he had enough trust in humanity to just stand and wait for someone to see and help him. Perhaps he knew something about people, the rest of us didn't know. But, whatever it may be, he would always stand there, waiting.

When you go towards him, you will find his eyes fascinating. They are large, dark brown eyes, but it's not just that... There's more.

His eyes tell a story. Perhaps a story of poverty, sadness and a family crisis. A story of gangs, drug dealers and unhappiness.

But yet it seems as if there is something else, something deeper than the surface. It's like a light shining through his eyes and pouring out of him.

This confusion makes you ask; “What is your name, little boy?” “Ithemba,” he says. “It means hope.”

Shirley Retief Grade 9



Lief en Leed

Die ooievaar het nogmaals 'n besige kwartaal gehad. Baie geluk aan Mnr. en Mev. Wepener met die geboorte van Llewellyn. Baie geluk aan Mnr. en Mev. Hurter met die geboorte van hul kleinseun, Luca Olivier.

Baie geluk ook aan Mnr. en Mev. Barnardt met die inseëning van hul seuntjie, Christiaan.



R. EYGELAAR

P.J. is trots op ons oud-skoliere



Ons is saam met haar ouers trots op Marli Vlok wat haar doktorsgraad behaal het. Universiteit Stellenbosch het erkenning deurgegee van Gustine Hendrikz (B.Com), Gerrit Bosman (B.Ing) en Chico Munoz (Dip Prak Mus). Baie geluk aan elkeen van hulle.

Baie geluk aan Kayla, dogter van Mnr. en Mev. Warren, wat ook haar diplomaplegtigheid gehad het.

Chanté Odendaal het by Rhodes Universiteit Akademiese half-kleure met haar prestasie in Chemie 1 verwerf. René Barnard is by Rhodes Universiteit aangewys as die beste eerstejaarstudent in Afrikaans.

Hierdie studente hou definitief ons skool se naam hoog.

R. EYGELAAR



Die Top Vyf-leerders word aan die einde van elke eksamenkwartaal (dus kwartaal twee en vier) aangewys. Hierdie leerders ontvang 'n balkie wat hulle met trots kan dra. Die balkie moet aan die einde van die volgende eksamenkwartaal terug gegee word en die leerder kan dan weer daarvoor kwalifiseer. Geen balkies word toegeken vir die eerste en derde kwartaal nie, alhoewel die name van hierdie leerders in die nuusbrief gegee word.

Graad 12	Graad 11	Graad 10
1. Daniel Retief 80,6 %	1. Simoné Schoonbee 73,3 %	1. Brett Arnolds 75,1 %
2. Thato Maseko 78,6 %	2. Kaelin du Plessis 71,4 %	2. Nikita Heinen 72,3 %
3. Chevandré Doyle 77,1 %	3. Amy-Leigh vd Walt 71,3 %	3. Marelise Grobbelaar 70,4 %
4. Shalisha Sampson 68,1 %	4. Cherise Steyn 70,7 %	4. Benri Niehaus 61,3 %
5. Jaydee Murray 67,6 %	4. Jean-Mari Barnardt 70,7 %	5. Joanet Myburgh 59,4 %
Graad 9	Graad 8	Graad 7
1. Shirley Retief 86,4 %	1. Bianca Schoonbee 76,9 %	1. Carissa Henning 86,9 %
2. Cara Meyer 74,8 %	2. Eden Matroos 75,2 %	2. Zurayda Jackson 75,0 %
3. Carla Odendaal 72,8 %	3. Juliana Henning 71,7 %	3. Zané van Wyk 70,2 %
4. Lané van Vuuren 71,4 %	4. Jaydene Isaacs 71,1 %	4. Miché-Lyn Meyers 68,0 %
5. Lacretia Stuurman 70,9 %	5. Junayden Kadie 66,4 %	5. Thangolwethu Coko 63,7 %
Graad 6	Graad 5	Graad 4
1. Marcelle Schoonbee 83,8 %	1. Anshin Nel 89,7 %	1. Kweziolomso Smaile 83,8 %
2. Tyronique Jagers 80,3 %	2. Simoné Myburgh 85,7 %	2. Zanmari Shaw 82,0 %
3. Nikita Fourie 76,0 %	3. Brandon Wentzel 84,7 %	3. Langalam Smaile 79,0 %
4. Zozibini Mapoma 75,0 %	4. Jade Goliath 78,0 %	4. Conré Henning 74,7 %
5. Christo Botha 68,0 %	5. Carla Olivier 73,7 %	5. Marthinus van Wyk 73,2 %

C. HENNING

Olimpiades en Kompetisies

Twintig van ons Laerskoolleerders was dapper genoeg om op Maandag 7 Mei deel te neem aan die SAMF se Wiskunde Olimpiade. Hierdie Nasionale Olimpiade is van 'n baie hoë standaard en het die leerders behoorlik uitgedaag. Die volgende leerders het deurgedring tot die finale rondte, waaraan hulle in Augustus sal deelneem: Anshin Nel, Brandon Wentzel, Simoné Myburgh, Carissa Henning en Zané van Wyk. Brandon het 'n allemintige 70 % behaal, waarop ons baie trots is.

Hoërskoolleerders wat verlede kwartaal deurgedring het tot die SAMF Wiskunde Olimpiade se tweede rondte, het op 16 Mei hierdie toets geskryf. Ons het ongelukkig nog nie hul uitslae gekry nie.

Gr.7-leerders word jaarliks uitgenooi om aan Scifest se astronomie vervaagdeel te neem. Zané van Wyk, Zurayda Jackson en Carissa Henning het deurgedring tot die tweede rondte van hierdie vervaag. Hulle het op 24 Mei PJ verteenwoordig by Victoria Primary waar hulle as 'n groep vroeë moes beantwoord.

Wetenskap

Leerders wat in die Wetenskappe belang stel, kan deelneem aan Eskom se Wetenskap Ekspos wat 4 Augustus sal plaasvind. Ons het ongelukkig baie min leerders wat reeds ingeskryf het om aan hierdie spoggeleenheid deel te neem. Daar is verskeie prysse op die spel, die gesogste hiervan is 'n beurs wat die beste vyf inskrywings se volle eerste jaar van studies by Rhodes Universiteit sal dek. Leerders wat ingeskryf het, werk alreeds van die begin van die kwartaal af aan hul projekte. Indien u kind nog wil inskryf, moet u asseblief dringend met my kontak maak, aangesien inskrywings eersdaags sluit. Leerders kry nie net die geleentheid om as jong wetenskaplike navorsing te doen nie, maar word ook tydens die ekspos blootgestel aan verskeie Departemente by Rhodes Universiteit, waar hulle inspirasie kan kry vir verdere studies. Indien u navrae het hieroor, kan u my epos by chenning@hspjolivier.co.za

Die CAPS-kurrikulum is baie gebrekkig om Gr. 7-9 leerders se belangstelling te prikkel in die Wetenskappe. Ons probeer om belangstellende leerders bloot te stel aan meer as net die basiese deur ekstra praktiese aktiwiteite en uitstappies te reël. 'n Groep leerders het byvoorbeeld die geleentheid gekry om te eksperimenteer met sure en basisse en kon al die reënboogkleure van indikators waarnem. Ek hoop om meer praktiese aktiwiteite volgende kwartaal aan te bied. Wiskunde is ongelukkig 'n vereiste vir die meeste Wetenskaprigtings en slegs leerders met 'n gemiddeld van meer as 60 % vir Wiskunde sal hierdie aktiwiteite kan bywoon.



C. HENNING

P.J. Sport

Hokkie



Die hokkie vir die tweede kwartaal het skitterend afgespeel. Ons het vir Linkside, Wesbank en Port Alfred aangevat. Intussen het ons twee oefenwedstryde teen VG gespeel. Ons dogters het puik sportmanskap getoon op die veld. Hulle was ge motiveerd en bereidwillig om niks minder as hulle bes te gee nie. Daar was 'n paar beserings langs die pad, maar genadiglik het ons volkome herstel en is reg om die derde kwartaal aan te vat! Baie dankie aan kaptein Shalisha Sampson en onderkaptein Vicki Van der Westhuizen vir hulle leiding en inspirasie. Spelers van die wedstryde was: Simoné Schoonbee, Jean-Mari Barnardt, Vicki V/d Westhuizen, Yolisa Gulwa. Baie dankie ook aan Rochney Stone, ons doelwagter. Niks kom verby haar nie! Sien julle volgende kwartaal.



B. KORF

Hoëskool Rugby



behalwe 2 gewen. 'n Hoogtepunt van die seisoen tot dusver was ongetwyfeld die puik vertoning wat al ons spanne teen die sterk spanne van Middelburg gelewer het. Groot dank gaan ook aan ons buite-afrigters wat 'n ongelooflike bydrae maak tot die sukses van ons spanne.

Vir die eerste keer in baie jare kon P.J.Olivier drie spanne (onder 15, onder 16 en eerstespan) in die veld stoot. Al drie hierdie spanne het tot dusver uitstekende seisoene beleef. Nie net was ons op Saterdae betrokke by wedstryde nie, maar ons het ook op Woensdae deelgeneem aan die plaaslike Vuka-program. Die eerstespan het tot dusver al sy wedstryde

J. TALJAARD



Laerskool Rugby



Die o/9; o/11 en o/13-rugbyspanne het verskeie wedstryde die afgelope kwartaal gespeel en ons is trots op ons uitslae.

Die o/13 rugbyspan het gaan deelneem aan Laerskool Hangklip se Sporttoernooi in Queenstown op Saterdag 21 April, ons speel drie rugbywedstryde teen Hangklip, Dordrecht en Adelaide. Ons het twee van hierdie wedstryde gewen en speel een gelykop gespeel.

Hierna het die laerskool se rugbyspanne verskeie wedstryde gespeel teen Port Alfred, Grahamstad Primér, Kenton-on-Sea, Fort Beaufort, Oatlands en Kingswood. Enkele van die wedstrydtellings wat uitstaan is die o/13's se oorwinnings oor Kenton-on-Sea en Oatlands; o/11's se oorwinning teen Oatlands en Grahamstad Primér en o/9's wat vir die eerste keer in baie jare vir Kingswood met 31-22 gewen het.

Oom Johannes het die afrigting van die o/13 rugbyspan oorgeneem en sy kennis van rugby, asook sy liefde vir ons kinders is alles deel van sy wenresep. Dankie dat u nie net ons spelers se rugbyvaardighede verbeter nie, maar ook hulle karaktereienskappe en harte aanraak.

Ons is hartseer om afskeid te neem van een van ons oudskoliere, wat tans studeer by Rhodes-Universiteit, en die afriger is van ons o/9 rugbyspan. Baie dankie aan Renaldo Gombert wat ongelooflik baie beteken het vir ons o/9 rugbyspan. U het baie ure afgestaan om hierdie klein pienkvoetspannetjie tot hoër hoogtes te neem en u puik en doelgerigte afrigting het baie vir elkeen van hulle beteken – ons sal u mis. Renaldo verlaat ons aan die einde van die rugbyseisoen.

Veels geluk aan Quinn Dirkse wat gekies is om te gaan deelneem aan die OP Subunie-rugbytoernooi op Cradock vanaf Donderdag 21 Junie tot Saterdag 23 Junie. Hierdie toernooi word elke jaar aangebied by die Landbouskool Marlow se rugbyvelde. Quinn verdien sy plek in die Albanie o/13 Rugbyspan en ons is trots op sy deelname aan hierdie gesogte rugbytoernooi.

Ons versoek al die ouers om te help met vervoer op Saterdag 18 Augustus wanneer ons die verjaardagviering van Laerskool Kenton-on-Sea gaan bywoon en gaan deelneem aan hulle sportdag.

Baie dankie aan al die getroue afrigters wat meer as hulle plek volstaan op die rugbyveld en u passie vir afrigting. Dankie aan ons ouers wat getrou vervoer aanbied en u kind ondersteun langs die sportveld.

M. CRONJÉ



Hoëskool Netbal

Sover was dit 'n goeie netbalseisoen. 'n Paar positiewe punte wat ek graag wil uitlig:



Ons het die jaar SEWE Hoëskool netbalspanne en goeie en lojale buite-afrigters wat ons help met spesifieke spanne. Drie leerders (Simoné Schoonbee, Jean-Mari Barnard en Amy-Leigh van der Walt) het hul netbalkursus (teorie en skeidsregter) voltooi en help met afrigting by onderskeie spanne. Mev. Van Wyk (nuwe graad 4-juffrou) voltooi ook haar netbalkursus om sodoende vertroud te raak met die nuwe reëls.

Mev. Janse van Rensburg het ons hand versterk met die baie admin van netbal asook om behulpsaam te wees met ons C-spanne. Mev. Barnard het ook haar hulp kom aanbied nadat sy van kraamverlof teruggekeer het. Ons kon blootstelling gee vir ELKE SPAN tydens wedstryde. Indien 'n skool net vir ons 'n A-span kon bied, het ons die B-span ook teen hul A-span laat speel.

MAKANA BRICK was weer bereid om nog 'n borgskap aan ons toe te staan om sodoende te verseker dat die hokkiemeisies ook dieselfde rompie kan dra as die netbal. Ons is trots om te kan sê dat ons nou eenenvormigheid het met ons netbaldrag.



Deel van ons langtermyn plan vir ons netbal is om ouers die kans te gee om die rooi atletiekhemp aan te skaf vir die netbalseisoen ook. Daar is nog enkele dogters wat steeds die wit golfhemp dra saam met hul netbaldrag. Ons versoek u dus vriendelik om dit vir u dogter aan te koop, aangesien ons ook afgerond wil lyk as ons teen ander skole speel.

BUCO het ook vir ons tien wedstrydballe geskenk . Elke span van 0/8 tot die 1ste span speel met nuwe wedstrydballe.

Nog 'n hoogtepunt is Celeste Jonck wat deurgedring het tot by die Oostelike Provinse se O.15-proewe.

Ek hoop dat ons met hierdie mooi gees sal voortgaan in die tweede deel van die netbalseisoen en dat elke dogter betyds sal opdaag en ELKE oefening getrou sal bywoon. Sterkte vir ons eerste span wat opbou na hul toer in Augustus. Dankie vir elkeen wat ook agter die skerms vir ons help, soos die koeldrankaandraers en die noodhulp wat altyd op hul pos is om ons te help .

Bly fiks die vakansie. As jy 'n doelpaal het, bly doel – sodat ons sommer net voort kan bou op 'n pragtige seisoen.

Netbalgroete

H. COETZEE

Laerskool Netbal



Ons het ook 'n baie suksesvolle "Round Robin" aangebied vir Laerskole op 19 April. Ons 0/10 tot 0/13 spanne het hier die geleentheid gehad om teen verskillende skole te kon meeding.

Ons het wedstryde gespeel teen Port Alfred High School, Kingswood College, Victoria Primary, St. Mary's en Oatlands. Die O/13's het ook deelgeneem aan 'n toernooi by Hangklip in Queenstown.

Baie dankie aan al die ouers wat hul dogters so gereeld op 'n Woensdagmiddag of Saterdagoggend ondersteun.

Ons wedstryd teen Kenton-on-Sea sal volgende kwartaal gespeel word.



C. VAN VUUREN



Tennis

Baie geluk aan ons tennisspelers wat gekies is vir die Albanie-span. Hulle sal op Vrydag, 13 Julie en Saterdag, 14 Julie teen die Westelike Provinsie speel.

Marcel Schoonbee	onder 12 dogters — nommer 8 gekeur
Shirley Retief	onder 16 dogters — nommer 8 gekeur
Benri Niehaus	onder 16 dogters — nommer 10 gekeur
Litha Zabo	onder 16 seuns — nommer 7 gekeur

Ons sien uit na ons Hoërskool Tennistoernooi in Middelburg op 24 en 25 Augustus.

A.E. GOWAR

Ma-en-Dogteree Fotoblad





Laerskool Monitors wys hul waardering vir ons omgewerwers

Ons Laerskoolmonitors kry elke jaar die geleentheid om met Moedersdag en Vadersdag 'n projek te loods. Dit is ook 'n geleentheid om ons werkers van die koshuis, terreinpersoneel en werkers by die skool te vereer met 'n huldeblyk van waardering vir hulle harde werk asook om vir hul 'n heerlike Vadersdag en Moedersdag toe te wens.

Hierdie jaar het ons Monitors vir die dames 'n heerlike warm serp oorhandig. Dit is gebrei deur 'n ou tannie wat net wil besig bly deur die dag en sy het aangebied om die serpe vir ons dames te brei.

Met Vadersdag het ons Monitors vir elke werker wat betrokke is by ons skool asook die sekuriteitswag, 'n "sakdoek bondeltjie" oorhandig.

H. COETZEE



LO Prakties Kwartaal 3

Graad 4 tot 7:

Woensdag, 29 Augustus vanaf 14:00—16:00

Gr. 8 tot 11:

Donderdag, 30 Augustus vanaf 14:00—16:00

Dit is verpligtend vir alle leerlinge. Onthou jou LO-klere!



Skaak



Die skaak het goeie vrugte gepluk in die tweede kwartaal. Ons het hard geoefen en het teen beide Graeme en VG gespeel. Baie dankie aan kaptein Cole Ambraal en onderkaptein Ruwayne Stokes vir hulle leiding en kennis.

B. KORF

Gr. 10 Lewenswetenskappe

Die graad 10 Lewenswetenskappelas het vir 'n projek, mielies agter by die koshuis geplant. Ons het weekliks die mielies natgemaak en gekyk hoe hulle groei. Ongelukkig het die winter ons ingehaal en die plante kon nie die ryf weerstaan nie. Nogtans dankie vir die pret.

B. KORF



Noodhulp

Kneusplekke, valmerke en bloukolle (asook die yspakkie vir daardie seer spier). Niks is te groot of te klein vir ons noodhulpspan nie. Baie dankie aan Chevandré Doyle vir sy deeglike organisering: Daar is te alle tye 'n noodhulpsbeampte, vol toegerus, langs 'n sportsveld! Ons span bestaan uit: Chevandré Doyle, Claude Hilpert, Danie Van Vuuren, Tamzin April, Amory Stemmet, Cherise Steyn en Kaelin Du Plessis.

B. KORF & M. SCHOEMAN

Gr. 11 Schools' Festival Report

The Eastern Cape Schools' Festival was officially opened by the Grahamstown Foundation CEO, Mr Tony Lancaster and keynote speaker, Mr Xabiso Zweni.

The warm welcome by Victoria Girls' pristine acapella group, as well as a performance of, "The Ghost of Glenmore", ensured that we were seated comfortably in our seats.

The, "Voice for Life" workshop started the fire in our creative thinking which paid off in the "Think on your feet", workshop which mainly consisted of your ability for improvisation.

We sang, danced, talked, acted and addressed some very serious social issues in our South African context.

The second day was started with a lecture from Mr Tsepo Leperesand in which he highlighted the necessity of fighting apathy and to engage in issues of Identity , Social Economy, Inequality and the power of Social Media. "Rocking to the Beat", tested everyone's choreographic skills and re-energizing us for the rest of the day.

The last workshop, "Getting Creative out of your Head," confronted all series of social issues including gun violence, racial conflict and children not being able to be children.

I would like to thank Mr Goba for the daily transport, Mr Oosthuizen for guiding us, but mostly I would like to thank Mrs Gowar for all the organization and Mr Retief for allowing us to attend this amazing festival.

Thank you

Wandile Ndlovu



Hou asseblief die 16de Augustus oop! Ons gaan daardie aand P.J. Olivier se talent eerstehands ervaar. Oudisies sal plaasvind vanaf 23—26 Julie. As jy kan sing, dans, gedigte voordra, ens. is hierdie jou kans om jou talent uit te leef.

R. EYGELAAR

Huis WEG Louw



Gedurende die tweede kwartaal het ons 'n paar groepe gehuisves insluitend: skuts, rugbyspanne asook Laerskool Voorpos se koor wat eersdaags op Kyknet gaan gesig wys.

Ons het ook 'n nuwe koshuismaat ryker geword. Baie geluk aan Mr. en Mrs. Wepener met die geboorte van hul seuntjie, Llewellyn Wepener.

Baie dankie aan Mrs. van Vuuren wat die snoepie vir ons behartig.

Ons wil ook ons uitstekende span werkers bedank vir die harde werk deur die kwartaal en sterkte toewens vir die fees wat voorlê.

L. WEPENER

Redenaars

Op die 15de Mei het Laerskool- en Hoërskoolleerders aan die jaarlikse interne redenaarskompetisie deelgeneem.

Die wenners is soos volg:

Hoërskool

1ste plek: Charlene Botha

2de plek: Shirley Retief

3de plek: Megan Blignaut

Laerskool

1ste plek: Anchin Nel

2de plek: Marthinus van Wyk

3de plek: Jorden Smith

M. SCHOEMAN

Grondslagfase Uitstappies



Dit en Dat



Opleiding deur Makana Brick



Na opleiding deur Makana Brick vanaf 21 Mei tot 8 Junie, is ons bevoorde dat Patrick Booij en Abongile Budaza hulle nuutverwore kennis kan kom toepas. Hulle is tans, met die hulp van Luzuko Adam en Frikkie Maerman, besig om by die Grondslagfase 'n parkeerarea uit te plavei. Ons sien uit daarna om die eindproduk te sien en in gebruik te neem.

R. EYGELAAR



P.J. Olivier Ondersteuners Gholfhemde


Ons het reageer op verskeie navrae van ouers en oudskoliere rakende die beskikbaarheid van 'n "P.J. Olivier Ondersteunershemp".

Dit is intussen ontwerp en hierdie pragtige rooi gholfhemp met die skoolwapen is nou verkrygbaar by die plaaslike takke van Xtreme Embroidery en Heinen Uniforms/Embroidery Studio. Hierdie amptelike verskaffers het ons laat weet dat dit beskikbaar is vanaf 'n klein nommer tot 'n vyf ekstragrootte nommer.

Gaan kry sommer vandag nog een en wees deel van die P.J.-Familie tydens sportdae en ander informele P.J. byeenkomste.

M. CRONJé

die klerehank



Baie beskikbaar:

Langbroeke en hemde vir seuns

Truie en "pull-overs"

Skoene

Rokke vir dogters

'n Paar swart langbroekies vir dogters

'n Paar baadjies

Kom loer in:

2de pouse

Woensdae en Vrydae: 13:30—14:00

Reël 'n spesifieke tyd

Skakelpersoon:

Mev. Coetzee

Indien u klere wat te klein is wil ruil vir groter klere, kan u gerus kom kyk. As iemand dalk nog baadjies of "dry mac" baadjies wil kom ingee, sal ons baie dankbaar wees.

Bankbesonderhede:

Hoërskool P.J. Olivier

ENB: 620 110 48 627

Tak: 210 717